

# **Badische Landesbibliothek Karlsruhe**

**Digitale Sammlung der Badischen Landesbibliothek Karlsruhe**

**Maneige royal, où l'on peut remarquer le défaut et la perfection du chevalier en tous les exercices ...**

**Pluvinel, Antoine**

**Paris, 1624**

[Text]

[urn:nbn:de:bsz:31-143628](https://nbn-resolving.org/urn:nbn:de:bsz:31-143628)

Piero Antonio Ferrara Gentil-homme Napolitain, en son temps excellent homme de cheual, qui en a si bien escrit & avec tant de labeur & de iugement, qu'il est impossible de faire mieux. Je me suis contenté de me seruir seulement d'une douzaine ou environ de mords differents pour emboucher toutes sortes de cheuaux. Le premier, \* vn canon à la pignatelle: c'est à dire, que les pas d'asne trebuche en arriere, qui ne peut offenser le palais de la bouche du cheual. \* L'autre, vne escache à pas d'asne de mesme, \* L'autre, vne escache avec deux petits melons à couplet montant, garny d'annelets rayez, & faut que tous les pas d'asne en soient garnis, pour donner plaisir à la langue du cheual. \* L'autre tout de mesme, excepté que l'escache c'est la forme d'un petit bastonnet, & les melons plus haultets comme balottes. \* L'autre, deux melons avec des petits anneaux, & derriere à pas d'asne, tout d'une piece. \* L'autre, deux poires fort estroites, avec deux petites balottes prez du pas d'asne qui trebuche des deux costez. \* L'autre, de poires couppees le pas d'asne. \* L'autre, deux poires reuersées à la Piero Anthonio, que le pas d'asne prend entre la branche & la poire. \* L'autre, vne Pluinelle, qui est l'emboucheure toute d'une piece à peu près comme vne simple genette. \* L'autre de mesme, avec deux petites balottes fort estroites, & enchassées dans l'emboucheure. \* L'autre, vne bastarde, qui tient de la genette & de la Françoisse, qui a de l'ouuerture, & n'a point de pas d'asne, la gromette est toute d'une piece, & de fa-

\* Fig. 10.  
DDD.\* Fig. 11.  
EEE.\* Fig. 12.  
FFF.\* Fig. 13.  
GGG.\* Fig. 14.  
HHH.\* Fig. 15.  
III.\* Fig. 16.  
KKK.\* Fig. 17.  
LLL.\* Fig. 18.  
MMM.\* Fig. 19.  
NNN.\* Fig. 20.  
OOO.

çon qu'elle soustient iuste tout le mords. \* L'autre, <sup>\* Fig. 21.  
PPP.</sup> vne gennette, dequoy ie me sers pour les hacquennées, cheuaux de pas, ou de chasse, ie les en treuve plus legers à la main: mais pour bien ordonner vn mords propre au cheual que l'on veut emboucher, il faut sçauoir cognoistre & iuger ce que le cheual a de besoing pour sa commodité & celle du Cheualier. Premièrement luy faut donner sa conuenable liberté de langue, apres que l'emboucheure repose & porte iustement sur le coing des genciues seulement, & s'il est de besoing faut desarmer les levres, c'est à dire separer la levre d'avec la genciue: car il y a quantité de cheuaux qui mettent la levre sous l'emboucheure, qui leur sert de couffinet: apres que les branches soient appropriées, courtes, longues, flasques, ou hardies, & l'œil haut ou bas, selon que le requiert la forme de l'encolure, & la posture de la teste du cheual, apres que la gromette porte & repose en sa place sur toutes choses: apres si la bouche est beaucoup ou peu fendue, & s'il la tourne deçà delà en façon de ciseaux, ou qu'il l'ouure par trop, voila les principales choses, à quoy il est necessaire de prendre garde soigneusement & de bien près, pour ordonner iudicieusement vn mords propre au cheual & à la main du maistre, afin qu'il s'en puisse bien seruir sans incommodité. Je diray donc qu'avec le canon à la pignatelle bien proportionné d'emboucheure, ny trop large, ny trop estroite, & de branches ny trop longues, ny trop courtes, ny trop hardies, ny trop flasques, & l'œil ny trop haut, ny

trop bas, & que la gromette repose iuste en sa place, qui est dans le petit ply dans la barbe du cheual, & que les crochets de la gromette soient fort courbez en haut & vers la branche du mors, de crainte qu'ils ne luy pincent la levre, ce qui arriue fort souuent, plus à ceste emboucheure qu'aux autres. Pour la rondeur du canon, qui enfle & releue la levre par trop, il n'y a cheual qui ne puisse bien seruir avec vn tel mors: & ordinairement à l'Escole ie ne me sers que de canon, ou escache à la pignatelle; pource que les cheuaux ne se doiuent, ny ne se peuvent bien dresser, qu'avec l'vne de ces deux sortes d'emboucheure de mors. Je tiens l'escache beaucoup meilleure & plus propre; pource qu'elle ne releue pas tant la levre que le canon, & si elle n'est point plus rude: mais pour seruir au maistre, quand le cheual est dressé, s'il est de besoin, ie luy ordonne vn autre mors pour le rendre plus leger, & plus aysé à la main, en prenant garde le plus qu'il m'est possible aux deffauts de Nature, pour adiouster ou oster du mors, ce que ie puis iuger le plus propre & vtile suyuant mon intention, qui est d'emboucher le cheual en sorte qu'il ne soit point offensé, ny dedans, ny dehors de la bouche. Je croy que chaque cheual a besoing de liberté de langue, les vns plus, les autres moins: car ceux qui ont la langue grosse, il est necessaire que le pas d'asne de l'emboucheure du mors soit plus grande qu'à ceux qui l'ont desliée: & si les genciues sont charnues, les poires, les campanelles, ou les rouelles sont les plus propres pour cet effect, &

sont propres aussi pour empescher que le cheual ne mette les levres dessous l'emboucheure; pource que ces trois sortes d'emboucheure separent les levres d'avec les genciues: & si les genciues ne sont point charnues, quin'ont iustement que la peau pour couvrir l'os des barres, le canon, l'escache, les melons, les balottes, ou la pluvinelle, seront plus propres que les autres: & si le cheual a la bouche beaucoup fendue, luy faudra du fer d'avantage dedans, ou bien faire mettre la tranche-file plus haut près de l'œil de la branche du mors, voire dans l'œil mesme, s'il est besoin: & s'il a la bouche petite & peu fendue, luy faudra mettre peu de fer dedans, & s'il est de besoin, oster la tranche-file du tout: & si le cheual ouvre la bouche par trop, le pas d'asne à la pignatelle luy sera plus propre; pource qu'il trebuche en arriere sur la langue, il a esté inuenté tout exprés pour cet effect, & pournepas offencer le palais de la bouche du cheual: mais s'il tourne la bouche deçà delà en façon de ciseaux, les emboucheures d'vne piece sont les meilleures, & necessaires pour empescher ceste action mal seante: & avec cela faut que la muserole de la bride soit tousiours à tous les cheuaux fort serré. Voila ce qui est de besoin de bien iuger pour le dedans de la bouche du cheual, en adjoustant, ou diminuant, ou aduancer, ou reculer, ou changer quelque piece de l'emboucheure: & quant à la gromette, encores qu'il s'en fait de plusieurs manieres & façons, ie ne me sers que de l'ordinaire bien proportionné, excepté quand le cheual a la barbe desliée, tendre & trop

sensible,